



10. oktoberi 2016

UKA2016/101

Danmarkip naalagaaffiata inatsisaata tunngaviusup § 42-ni ikinnerussuteqartunik illersuinissamut aalajangersakkamut aallaaviatigut naapertuuttumik Inatsisartuni inatsisissatut siunnersuummik akuerineqarsimasumik, pisut aalajangersimasut ataasiakkaat minillugit, Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit innuttaasunik taasititsissutigineqarsinnaanissaanik aalajangiisoqarsinnaanissaanik Naalakkersuisut UPA2017-mut inatsisissatut siunnersuusioqqullugit peqquneqarnissaannik Inatsisartunut aalajangiiffissatut siunnersuut.
(Inatsisartunut ilaasortaq Peter Olsen, Inuit Ataqtigiit)

Inatsisartunut ilaasortaq Peter Olsen Inuit ataqtigiit siunnersuuteqarpoq tassalu ikinnerussuteqartunik illersuinissamut tunngasumik, tassalu innuttaasut taasisinneqartarnissaannik inatsisartuni ikinnerussuteqartunit minnerpaamik ilaasortat pingajorarterutaannik kissaatigineqarpat tamannalu siunnersuut oqaaseqarfigissavarput.

Nunatsinni tamat oqartussaqaataanerit atuuttoq erligisassaavoq atugassallunilu mianeralugu, aammalu tamat oqartussaqaataanerit amerlanerussuteqarnikkut aqutsiffiusoq Partii Naleqqamiit erlinnartutut isigaarput, tassami innuttaasut amerlanerit imaluunniit inatsisartuni amerlanerit aalajangiinerat ataqqissassatut isigigatsigu, tamannalu inuiaqtigiit ataatsimut isigalugit taamatut ingerlaannarnissaa illersorparput.

Tassami ikinnerussuteqarluni nuannerpallaanngilaq ilaanni isummat illersukkat ajorsarfigalugit, tamannalu tassa inatsimmik illersukkamik aqutsineruvoq, tassalu amerlanerusut isumaat tamat oqartussaaffiini malinneqartarmat, tamannalu ataqqillugu Partii Naleqqamiit oqaatigissavarput.

Isumaqarluinnarpugut tamat oqartussaaqaataanerit nunatsinni eqqortumik atuutsinneqartoq, uagullu Partii Naleqqami tamanna unioqqutinneqartutut misiginngilarput, akuerivarpullu amerlanerussuteqarneq, taamatullu ingerlaannartoqarnissaa tamakkiisumik tapersorsorparput.

Pisinnaatitaaffigut tunngavigalugit inatsisillu malittassat malillugit uagut innuttaaqataasutut aperineqartarpugut isumaqataagutta isumaqataanngikkutaluunniit isummeqquneqarluta tamannalu ajunngilluinnarpoq.

Tamannalu erligalugu allannortinneqartariaqanngitsoq oqaatigissavarput, tassami ikinnerussuteqarluni pilerinarluinnaraluarpoq taamatut ingerlasoqarnissaa sukkulluunniit taasisitsinnaalluta. Tassami taamak ingerlasoqalissappat taava tamat oqartussaaqaataaneranni aqutsineq isertortumik qinersinikkut atuutsinneqartut sumiilissapat? Annaaneqassapput “pinnguarnarit akisuut naalakkersuinikkut aallartissapput”

Tassami ileqquliunneqassappat itigarlutalu taava inuiaqtigiinnut taasisitsisalissagutta kingunissai pilerinanngilluinnartut takusinnaavagut Politikkikkut ikannerit pinnguarnerillu aallartissapput amerlanerussuteqartumik politikimik aqutsineq qimanneqarluni uagullu Partii Naleqqamiit tamanna peqataaffiginiannilarput, inuiaqtigiit taasisarnerat inatsisartunilu amerlanerusut aalajangiisarnerat ataqqigatsigu.

Taamatut oqaaseqarluta siunnersuut itigartipparput.

Hans Enoksen